

# DÍDZA'DAU' ZI'AL BUZUJË' LU GUICH SAN JUAN

## Didza' nabániru'

**1** Rguíxjöi'tu' lbi'ili' ca nac queë' Bönni' na' zoaczë' dza ni'të, le byónitu' bë'ë didza', len le blé'itu' ca nac queë', len le buyutu' benë' Bönni' na'. Gdantu' Lë'. Bönni' ni naquë' Jesús, lë' ca' Didza' Nabánigac Bunách. <sup>2</sup>Bönni' na' nabánigac bunách buluí' lahuë', ati' blé'itu' Lë'. Runtu' lna' lau queë', len rguíxjöi'tu' lbi'ili' ca nac queë' Bönni' na' nabániru'. Bönni' ni gzóalenë' Dios Xuz, len chduluí' lahuë' ga zoaru'. <sup>3</sup>Le blé'itu' len le byónitu' rguíxjöi'tu' lbi'ili' quië gacli' ca' lbi'ili' tuz len netu'. Le nactë yöl-la' tuz queëru' len Dios Xuz lenca' len Jesucristo Zxi'në' Dios nac. <sup>4</sup>Ruzujtu' queëli' lu guich lë ni quië gac udzjiru' gdu ládxi'ru'.

## Dios naquë' yení'

<sup>5</sup>Lë ni nac didza' byónitu' bé'lenë' netu' didza' Jesús, ati' le rguíxjöi'tu' lbi'ili'. Cni rna: “Dios naquë' yení', ati' nitú le nac chul xöhui' cutu runë' Lë’.” <sup>6</sup>Chqui' gnaru': “Nacru' tuz len Dios”, san chqui' runru' le nac chul xöhui', lë ni nac bë' rzi' yë'ru' len cutu runru' le nac gdtë

li. <sup>7</sup>Na'a, chqui' runru' dxi'a, rdaru' lu yení' ca na' Lë' naquë' dxi'a, zoë' lu yení', nacru' tuz turu' len yeturu', ati' xchönë' Jesucristo, Zxi'në' Dios ruún rë'u dxi'a, rugúa yúgu'të dul-la' nabága'ru'.

<sup>8</sup>Chqui' rnaru': “Cutu bi dul-la' runru’”, rzi' yé'iru' la' cuinzru', len cunazí' lu na'ru' le nac gdtë li.

<sup>9</sup>Chqui' gxualëpru' lahuë' dul-la' nabága'ru', Dios runë' ca rnë', len naquë' tsahui'. Unít lahuë' dul-la' nabága'ru' len unë' rë'u dxi'a, ugúë' yúgu'të le cunác dzag rë'u. <sup>10</sup>Chqui' gnaru': “Cutu bi dul-la' nabága'ru’”, nac ca gnaru': “Dios rzi' yë'ë”, ati' didza' queë' cutu runru' ca rna.

## Cristo naquë' Nu rudód xtídza'ru' lahuë' Dios

**2** Lbi'ili', zxi'na'dau', ruzuja' queëli' lu guich lë ni, cui gunli' dul-la'. Na'a, chqui' nütitëz nu gun dul-la', zoa nu rudód xtídza'ru' lahuë' Dios Xuz, Lë' Jesucristo, Nu nac tsahui'. <sup>2</sup>Nacczë' Nu budód cuini, gutië' quië bugúë' dul-la' nabága'ru' lahuë' Dios. Clëgz gutië' quië bugúë' dul-la' nabága'ru' rë'u, san gutië' ca' quië bugúë' dul-la' nabága'gac bunách gdtë yödzyú.

<sup>3</sup>Chqui' runru' ca nac le gna bé'inè' rë'u, nóziru' chnúbè'ru' Lè'.  
<sup>4</sup>Nu rna: “Neda' núbè'a-nè' Dios”, san cutu run ca rna bè' zxba queè', nu ni rzi' yè', len cutu run le nac gdutè' li. <sup>5</sup>Nu run ca rna xtidzè'è Dios, le nactè nadxí'i Dios nu ni ca ral-la' gun. Chqui' runru' cni, nóziru' náquiru' queè' Dios. <sup>6</sup>Lëzca' cni, nu rna: “Neda' náquida' queè' Cristo”, ral-la' gac nu na' ca na' ququè' Cristo cati' gdè' yödzlyú ni.

### Tu zxba cub

<sup>7</sup>Böchi' lza'adau', ruzuja' queëli' lu guich zxba ni. Cutu nac tu zxba cub, san zxba gul na', le zoalen lbi'ili' dza ni'tè. Zxba gul na' nac didza' byónili' dza ni'tè. <sup>8</sup>Lëzca' nac ca ruzuja' queëli' lu guich tu zxba cub, lè na' le nactè benè' Jesús ca rna, ati' runli' ca' lbi'ili' ca rna, le chrdöd qui le nac chul xöhui', ati' yení' gdu chrzení'.

<sup>9</sup>Nu rna: “Zoa' lu yení'”, san curle'i dxi'a böchi' lzè'i, nu ni ni run le nac chul xöhui'. <sup>10</sup>Zoa lu yení' nu nadxí'i böchi' lzè'i, len cutu zoalen lei le run ga nu gchixi gnigui. <sup>11</sup>Run le nac chul xöhui' nu curle'i dxi'a böchi' lzè'i, len rda ga chul. Cutu nözi ga zeaj, le run ga nachúl nanít nu na' le nac chul na'.

<sup>12</sup>Ruzuja' queëli' lu guich, zxí'na'dau', le chbunít lahuè' Dios dul-la' nabága'li', le runè' le gzxí' lu në'è gunè'. <sup>13</sup>Ruzuja' queëli' lu guich, lbi'ili' nacli' xuz, le núbè'li' Nu na' zoacz dza ni'tè. Ruzuja' queëli' lu guich, bi'i ra'bán, le chbuxicjli' tu' xöhui'.

<sup>14</sup>Chbuzuja' queëli' lu guich, zxí'na'dau', le núbè'li'-nè' Dios

Xuz. Chbuzuja' queëli' lu guich, lbi'ili' nacli' xuz, le núbè'li' Nu na' zoacz dza ni'tè. Chbuzuja' queëli' lu guich, bi'i ra'bán, le nacli' bi'i nal, ati' xtidzè'è Dios nazí' lu na'li', len chbuxicjli' tu' xöhui'.

<sup>15</sup>Cutu gdx'i'izli' yödzlyú ni, len clëg le dè yödzlyú ni. Chqui' zoa nu nadxí'i yödzlyú, cutu nadxí'i Dios Xuz. <sup>16</sup>Cni nac, le cutu nac le rë'nnè' Dios Xuz le tun bunách yödzlyú ni, san nac le tèn'i bunách yödzlyú ni. Tunè' le rdzag ladx'i' yöl-la' bunáchz quequè'. Tunè' le rdani yöj lauquè' le cunác. Tun ba zxon cuinquè' ni'a qui le dè quequè'. Cni nacgac le cunác tunè'. <sup>17</sup>Huadód qui yödzlyú ni lenca' qui le ta'zé' ladx'i'gac bunách, san nu run ca rë'nnè' Dios soa tsalzú.

### Nu rui' didza' gdutè li len nu rzi' yè'

<sup>18</sup>Zxí'na'dau', chzoaru' dza udx, len ca na' chbyónili' huidè' bönni' rdá'baguè'è Cristo, lëzca' na'a chgzu lau nacu'è zian bönni' ta'dá'baguè'è Cristo. Qui lè ni na' nóziru' chzoaru' dza udx. <sup>19</sup>Gularujè' ladjru' bönni' cni, san cutu glaquè' tuz len rë'u. La'naru' glaquè' tuz len rë'u, la'cuá'lenteczè' rë'u. Na'a, gularujè' quiè gac bè' cutu nacquè' tuz len rë'u yúgu'tè'.

<sup>20</sup>Na'a, chzoalen lbi'ili' Bö' La'y nagu'è rë'u Nu nac la'y, ati' nóziczli' yúgu'tè. <sup>21</sup>Buzuja' queëli' lu guich, le chnózili' le nac gdutè li, len clëg le cunózili' lei. Nózili' ca' cutu ca' rzi' yè' nu nözi le nac gdutè li.

<sup>22</sup>¿Nuzxa caz na' nu rzi' yè'? ¿Naru' cu nac nu na' rdá'baga' naquè' Jesús Nu bsöl'è'è Dios? Nac nu ni bönni' rdá'baguè'è Cristo, le

rdá'baguë'è naquë' Dios Xuzë' Jesús, len rdá'baguë'è ca' naquë' Jesús Zxi'në' Dios. <sup>23</sup>Núti'tëz nu rdá'baga' Dios Zxi'n, cutu ca' zóalenë' nu na' Dios Xuz. Núti'tëz nu rnë yalj lulu naquë' Zxi'në' Dios Jesús, lëzca' zóalenë' nu na' Dios Xuz.

<sup>24</sup>Na'a, gul-güü' latj ugá'nlentecz lbi'ili' le byónili' dza ni'të. Chqui' ugá'nlentecz lbi'ili' le byónili' dza ni'të, lëzca' lbi'ili' ugá'nlenteczli'-në' Dios Zxi'n lenca' len Dios Xuz.

<sup>25</sup>Nac lë ni le gzxí' lu në'è Dios, gunnë' queëru' yöl-la' na'bán gdu.

<sup>26</sup>Chbuzuja' queëli' lu guich lë ni ca nac quegac nup ta'zí' ye'i lbi'ili'.

<sup>27</sup>Na'a, zóalenë' lbi'ili' Dios Bö' La'y. Bsölë'è Lë' queëli' Cristo, ati' Lëczë' zóalenteczë' lbi'ili'. Qui lë ni na' cutu rquínili' nu usëdi lbi'ili', le chzoalen lbi'ili' Nu na' rusëdi lbi'ili', ati' didza' gdu'të li ru'ë Lë' len cutu rzi' yë'è. Ca na' chnazëdli', gul-zóalenteczë' Cristo.

<sup>28</sup>Na'a, zxi'na'dau', gul-zóalenteczë' Cristo quië cati' uluí' lahuë' Lë', gacru' rugu ladxi', len cutu utui'ru' soaru' lahuë' Lë' cati' huödë'. <sup>29</sup>Chqui' nózili' naquë' tsahui' Dios, ral-la' gnózili' ca' nacgac zxi'në' Dios yúgu'të nup tun le nac tsahui'.

### Nup nacgac zxi'në' Dios

**3** Gul-yú ca nadxí'titsquinë' rë'u Dios Xuz, benë' ga nazí' laru' zxi'në' Dioscz. Qui lë ni na' cutu ca' núnbë'gac le nacru' bunách yödzylyú ni, le cutu glunbë'è Jesús. <sup>2</sup>Böchi' lza'adau', na'a chnacru' zxi'në' Dios, len cutu nac bé'ini le ral-la' gacru'. Nóziru' cati' uluí' lahuë' Jesús, gacru' ca naquë' Lë', le glé'iru'-në'

catëz naquë' Lë'. <sup>3</sup>Núti'tëz nu run löz gac ca naquë' Jesús, rui' ladxi' gac dxi'a nu na' ca na' naquë' dxi'a Jesús.

<sup>4</sup>Núti'tëz nu run dul-la' rguitsj zxba queë' Dios, le nac le rguitsj zxba le nac dul-la'. <sup>5</sup>Nózili' buluí' lahuë' Jesús quië bugúë' dul-la' nabága'ru', len cutu bi dul-la' runë' Lë'. <sup>6</sup>Núti'tëz nu dzag Lë' cutu run dul-la'. Núti'tëz nu run dul-la' gatga ble'i Lë' len cutu nunbë' Lë' Jesús. <sup>7</sup>Zxi'na'dau', qui nadxi nu si' ye'i lbi'ili'. Nu run le nac tsahui', nac tsahui' nu na' ca na' naquë' tsahui' Jesús. <sup>8</sup>Nu runtecz dul-la' naqui qui tu' xöhui', le run dul-la' tu' xöhui' dza ni'të. Qui lë ni na' dului' lahuë' Zxi'në' Dios, quië usnitië' yugu' le nun tu' xöhui'.

<sup>9</sup>Núti'tëz nu nac zxi'në' Dios cutu runtecz dul-la', le zóalentecz nu na' le nazí' nu na' lu në'è Dios Xuz. <sup>10</sup>Cni nac bë' nup nacgac zxi'në' Dios len nup nacgac zxi'n tu' xöhui'. Núti'tëz nu curún le nac tsahui' len cunadxí'i böchi' lzë'i cutu naqui queë' Dios.

### Ral-la' gdxí'icru'-në' böchi'ru' ta'yejlë'è Cristo

<sup>11</sup>Lë ni nac didza' chbyónili' dza ni'të, le rna: "Ral-la' gdxí'iru' lza'ru' turu' yeturu'." <sup>12</sup>Cutu ral-la' gunru' ca na' benë' Caín. Guquë' Caín qui tu' xöhui' ati' budöddë'-bi' bi'i böchë'è. ¿Bizx quië budöddë'-bi' bi'i böchë'è? Budöddë'-bi' le glac le cunác le benë' Caín na', san le benbi' bi'i böchë'è, tsahui' glac.

<sup>13</sup>Bócha'adau', cutu ubánili' chqui' cuta'le'i lbi'ili' dxi'a bunách yödzylyú ni. <sup>14</sup>Nóziru' chgdödrü' lu yöl-la' gut

len chdë queëru' yöl-la' na'bán gdu le nadxí'igacru'-në' böchi'ru'. Nu cutu nadxí'i böchi' lzë'i, chnatez nu na'. <sup>15</sup>Núti'tëz nu curle'i dxi'a böchi' lzë'i, nac gdödi bunách nu na', ati' nózili' cutu dë yöl-la' na'bán gdu qui nitú nu rudödi bunách. <sup>16</sup>Cni núnbë'ru' yöl-la' nadxí'i le nac gdu, le budödë' yöl-la' na'bán queë' Jesús, gutië' uláz queëru'. Lëzca' cni rë'u ral-la' udödru' yöl-la' na'bán queëru', gáclencru'-në' böchi'ru'. <sup>17</sup>Na'a, núti'tëz nu dë yöl-la' tsahui' qui, lë na' dë yödzyú ni, ati' rle'i böchi' lzë'i, bi ryadzj queë', len cutu ruhuechi' ladxí' lë', bi unódzj queë', çnaru' nadxí'itsa Dios nu na'? <sup>18</sup>Zxí'na'dau', ral-la' gdxí'iru' lza'ru', clëg len didza'z o lu yöl-la' rnëz queëru', san gdu ládxi'ru' lenca' len gdu'të yöl-la' run queëru' ral-la' gdxí'iru' lza'ru'.

#### Le runru' löz lahuë' Dios

<sup>19-20</sup>Chqui' cni nadxí'icru'-në' böchi' lza'aru', nóziru' náquiru' qui Nu na' nac gdu'të li, ati' lahuë' Dios huac cö' dxi' icj ládxi'dau'ru' chqui' ruxós rë'u ládxi'dau'ru', le ráctscarë' Dios ca ládxi'dau'ru', ati' Lë' nözcnë' yúgu'të. <sup>21</sup>Böchi' lza'adau', chqui' cutu ruxós rë'u ládxi'dau'ru', dë le runru' löz lahuë' Dios <sup>22</sup>le nóziru' gunnë' queëru' bíti'tëz bi gnabru' lahuë'. Cni nac, le runru' ca rna bë' zxba queë' len le rdzag ladxë' Lë'. <sup>23</sup>Lë ni nac zxba queë', quië tséjlë'ru'-në' Jesucristo, Zxi'në' Dios, len gdxí'iru' lza'ru' ca na' chgna bé'inë' rë'u. <sup>24</sup>Zoalen Dios nu run ca rna bë' zxba queë', ati' Dioscz zóalenë' nu na'. Cni nóziru' dzágteczë' rë'u Lë', le chbsölë'ë queëru' Dios Bö' La'y.

#### Le nac bë' zóalenë' rë'u Dios Bö' La'y

**4** Böchi' lza'adau', cutu tséjlë'li' núti'tëz nu rna zóalenë' lei Dios Bö' La'y, san gul-sí' bë' nu na', chqui' zóalenë' lei Dios Bö' La'y, le ta'dé' yödzyú ni zian bönni' ta'zí' yë'ë, ta'né' tu'ë didza' uláz queë' Dios. <sup>2</sup>Cni gúnbë'li'-në' bönni' zóalenë' lë' Dios Bö' La'y. Naqui queë' Dios bönni' rnë' yalj lulu ca bidë' Jesucristo, Nu bsölë'ë Dios, rnë' guquë' gdu bunách. <sup>3</sup>Lëzca' cni, cutu naqui queë' Dios bönni' cutu rnë' yalj lulu ca bidë' Jesucristo, rnë' cutu guquë' gdu bunách. Bönni' ni náquinë' qui nu na' rdá'baga' Cristo, nu na' chbyónili' ral-la' guid, ati' na'a chzoa rda yödzyú ni.

<sup>4</sup>Zxí'na'dau', náquili' queë' Dios, len chbuxicjli' nup na' ta'zí' yë', le napr yöl-la' huac uná bë' Nu na' zoalen lbi'ili' ca nu na' rda yödzyú ni. <sup>5</sup>Lequë' nacquë' bunách yödzyú. Qui lë ni na' tu'ë didza' qui le nac qui yödzyú, ati' bunách yödzyú ni tu'zé naggac lequë'. <sup>6</sup>Náquiru' rë'u queë' Dios. Nu nunbë' Dios ruzé nag rë'u. Nu cunaqui queë' Dios cutu ruzé nag rë'u. Cni núnbë'ru' nu na' yu'u lei Bö' rui' didza' le nac gdu'të li lenca' nu na' yu'u lei bö' rzi' yë'.

#### Naljlen Dios yöl-la' nadxí'i

<sup>7</sup>Böchi' lza'adau', ral-la' gdxí'iru' lza'ru', le naljlen Dios yöl-la' nadxí'i, ati' núti'tëz nu nadxí'i lzë'i naljlen ca' Dios, len nunbë' Dios. <sup>8</sup>Nu cunadxí'i lzë'i, cutu nunbë' Dios, le naljlen Dios yöl-la' nadxí'i. <sup>9</sup>Cni bulu'ë lahui ca nadxí'inë' rë'u Dios, bsölë'ë yödzyú ni la'z dui Zxi'nczë', quië gata' queëru' yöl-la' na'bán gdu

ni'a queë' Lë'. <sup>10</sup>Cni nac bë' yöl-la' nadxí'i gdu, clëg ca nadxí'iru'-në' Dios, san ca na' Lë' bdxí'inë' rë'u, len bsölë'ë Zxi'nczë' quië gutië', bugüë' dul-la' nabága'ru'.

<sup>11</sup>Böchi' lza'adau', chqui' cni bdxí'itsquinë' rë'u Dios, lëzca' rë'u ral-la' gdxí'iru' lza'ru'. <sup>12</sup>Gatga nu ble'i Dios, san chqui' nadxí'iru' lza'ru', Dios zóalenë' rë'u ati' nac bë' nadxí'iru'-në' Dios gdu ládxi'ru'. <sup>13</sup>Nóziru' zóalenru'-në' Dios, ati' Lë' zóalenë' rë'u, le bsölë'ë queëru' Dios Bö' La'y. <sup>14</sup>Netu' blé'itu' le benë' Dios Xuz, len runtu' lna' lau qui. Lë' bsölë'ë Zxi'nczë' Nu ruslá bunách yödzyú. <sup>15</sup>Nu rnë yalj lulu naquë' Jesús Zxi'në' Dios, Dios zóalenczë' nu na', ati' lei zoalen Dios.

<sup>16</sup>Rë'u ni nóziru' len réjlë'ru' nadxí'inë' rë'u Dios. Naljlen Dios yöl-la' nadxí'i, ati' nu nadxí'i lzë'i, zoalen Dios nu na', ati' Dios zóalenë' lei. <sup>17</sup>Cni run dxin lu icj ládxi'dau'ru' yöl-la' nadxí'i, run ga cutur rádxiru' dza gchuguë' Dios quegac bunách. Ca naquë' Jesús, nacru' ca' rë'u yödzyú ni. <sup>18</sup>Chqui' gdxí'iru'-në' Dios, cutu bi gádxiru'. Cati' nadxí'iru'-në' Dios gdu ládxi'ru', runë' ga cutu rádxiru'. Nu radxi, rzaca' rguí'i. Nu na' radxi, cutu nadxí'i Dios gdu ladxi'.

<sup>19</sup>Rë'u ni nadxí'iru'-në' Dios, le bdxí'icznë' rë'u zi'al Lë'. <sup>20</sup>Chqui' nu gna: "Neda' nadxí'ida'-në' Dios", san cutu rle'i dxi'a böchi' lzë'i, nu ni rzi' yë'. Nu cutu nadxí'i böchi' lzë'i nu rlé'itë, çnacxcz gac gdxí'i Dios len gatga ble'i Lë'? <sup>21</sup>Cni gna bé'inë' rë'u Jesús, gnë': "Nu nadxí'i Dios, ral-la' gdxí'i ca' böchi' lzë'i."

### Ca gac uxicjru' lu le rac queëru' yödzyú ni

**5** Núti'tëz nu rejle' Jesús naquë' Cristo, nac zxi'në' Dios nu na', ati' núti'tëz nu nadxí'i Dios Nu buzóa lei, ral-la' gdxí'i ca' lzë'i nu nac zxi'në' Dios. <sup>2</sup>Cni ráquibe'iru' nadxí'igacru'-bi' zxi'në' Dios. Nac cni chqui' nadxí'iru'-në' Dios len runru' ca rna bé'inë' rë'u. <sup>3</sup>Cni nac bë' nadxí'iru'-në' Dios. Nac cni chqui' runru' ca rna bé'inë' rë'u, len cutu nac baníg lë na' rna bé'inë' rë'u. <sup>4</sup>Núti'tëz nu nac zxi'në' Dios ruxícj lu le rac yödzyú ni. Chbuxicjru' lu le rac yödzyú le réjlë'ru'-në' Dios. <sup>5</sup>¿Nuzxa na' ruxícj lu le rac yödzyú? Run cni nu rejle' naquë' Jesús Zxi'në' Dios.

### Dios Bö' La'y runë' lna' lau queë' Cristo

<sup>6</sup>Cni blë'ë Jesucristo, bidë' bdilë' nis, len bulaljë' xchönë', len clëgz bdilë' nis, san lëzca' bulaljë' xchönë'. Dios Bö' La'y naquë' Nu run lna' lau queë', le nac gdutë li didza' ru'ë Dios Bö' La'y. <sup>7</sup>Tsonn nup tun lna' lau queë' Jesús ni' yehua' yubá, Dios Xuz, len Dios Zxi'n, lë' ca' Didza', len Dios Bö' La'y. Yonnë' ni, tuz nacquë'. <sup>8</sup>Lëzca' cni, tsonn le tun lna' lau queë' luyú ni, Dios Bö' La'y, len le bdilë' nis Jesús, len rön ni' bulaljë' lë'i yag cruz, ati' yonn ni, tuz ca ta'ná. <sup>9</sup>Chqui' si' lu na'ru' le tun lna' lau bunách, le runë' lna' lau Dios nactër lsaca'. Lë na' benë' lna' lau Dios nac le benë' lna' lau queë' Jesús, gnë' naquë' Zxi'nczë'. <sup>10</sup>Nu rejle' Zxi'në' Dios, nazí' lu në'i le nunë' lna' lau

Dios. Nu curejlë' Dios, nac ca rna nu na': "Dios rzi' yë'ë." Cni nac, le cutu gyejlë' le benë' lna' lau Dios queë' Zxi'në'. <sup>11</sup>Lë ni nac le benë' lna' lau Dios. Gnë' chbennë' queëru' yöl-la' na'bán gdu, ati' Zxi'në' na' naquë' Nu nabániru' cni. <sup>12</sup>Nu zóalenë' lei Zxi'në' Dios, dë yöl-la' na'bán gdu qui. Nu cuzóalenë' lei Zxi'në' Dios, cutu dë yöl-la' na'bán gdu qui.

**Ca gnóziru' dë queëru'  
yöl-la' na'bán gdu**

<sup>13</sup>Lbi'ili' na' réjlë'li'-në' Zxi'në' Dios, ruzuja' queëli' lu guich lë ni quië gnózili' chdë yöl-la' na'bán gdu queëli', len quië gac gdu ca réjlë'li'-në' Zxi'në' Dios.

<sup>14</sup>Lë ni nac le ruzxöni ládxi'ru' Lë'. Chqui' bi gnabru' lahuë' ca rë'nnë' Lë', Lë' ryönnë' rë'u. <sup>15</sup>Chqui' nóziru' ryönnë' rë'u ca nac bi rnábiru' Lë', nóziru' ca' gdél-li'czru' lë na' rnabru' lahuë'.

<sup>16</sup>Chqui' nu gle'i böchi' lzë'i run dul-la' cunachë' yöl-la' gut, ral-la'

gnab qui nu na' lahuë' Dios, ati' Lë' gunnë' yöl-la' na'bán qui. Cni rnia': Ral-la' gnabli' quegac nup tun dul-la' cunachë' yöl-la' gut. Dë dul-la' nachë' yöl-la' gut. Cutu rnia' gnabli' qui nu run dul-la' cni. <sup>17</sup>Yúgu'të le cunác tsahui' nac dul-la', san dë dul-la' cunachë' yöl-la' gut. <sup>18</sup>Nóziru' cutu runtecz dul-la' nu nac zxi'në' Dios, le run chi'ë nu na' Zxi'nczë' Dios, ati' tu' xöhui' cutu saqui' bi gun qui.

<sup>19</sup>Nóziru' yu'uru' lu në'ë Dios, ati' yu'ugac lu na' tu' xöhui' yúgu'të bunách tui' ládxi'gac le dë yödzlyú ni.

<sup>20</sup>Na'a, nóziru' chbidë' ni Zxi'në' Dios, len bennë' queëru' yöl-la' rejni'i, quië gúnbë'ru' Nu na' nac gdutë li. Zóalenru' Nu na' nac gdutë li le zóalenru'-në' Jesucristo, Zxi'në' Dios. Nu ni nac Dios gdu, len Nu runn queëru' yöl-la' na'bán gdu. <sup>21</sup>Zxí'na'dau', gul-gún chi'i cuinli' cui tsej ládxi'cli' bdau' guiöj bdau' yag. Ca' gac.